

遵聞錄存是錄
東江始末存漢錄



存

是

錄

姚宗典輯

中華書局

存是錄

明 姚宗典 輯

一國本始末

顯皇帝二十九年辛丑冬十月十五日己卯詔冊皇長子爲皇太子時年二十歲矣太子係恭妃王氏生先是恭妃誕生皇長子在萬歷十年壬午八月丙申迄萬歷十四年丙戌皇第三子生卽進封其妃鄭氏爲貴妃科臣姜應麟部臣沈璟孫如法各有疏爭之上怒並降謫于是禮部侍郎沈鯉奏請並封恭妃王氏上諭待元子冊立後行嗣是開部省臺章疏請建儲者每歲凡幾十上而上一槩弗省也十八年正月朔上御毓德宮召輔臣申時行許國王錫爵王家屏見于西室時行等以冊立東宮係宗社大計爲請上曰朕知之朕無嫡子長幼自有定序鄭妃亦陳請再三恐外廷有疑但長子猶弱欲俟其壯大使出諸輔臣復請曰皇長子年已九齡蒙養豫教正在今日上領之時行等出上遽令內侍追止之云已令人宣皇子來與先生們一見輔臣還至宮門有頃皇長子皇三子俱至引到御榻前皇長子在御榻右上手攜之向明正立時行等注視良久因奏曰皇長子龍姿鳳表岐嶷非凡仰見皇上昌後之仁上欣然曰此祖宗德澤聖母恩庇朕何足以當之輔臣奏皇長子春秋長宜讀書且曰皇上正位東宮時方六齡卽已讀書皇長子今讀書已晚矣上曰朕五歲便能讀書復指皇三子云是兒亦五歲尙不離乳母遂手引皇長子

膝前撫摩歡惜。輔臣叩頭奏曰：「有此美玉，何不早加琢磨，使成大器。」上曰：「朕知之，時行等叩頭出。」是年十月，吏部尚書宋纁、禮臣尚書于慎行、率百官合疏請冊立東宮。上怒，皆奪俸。因頒諭建儲大禮，當于明年舉行。廷臣無得奏擾。如有再瀆者，直隸十五歲。故次年辛卯，自春及秋，無復言及此者。至冬十月，工部主事張有德請備東宮儀仗。中時行方在告。次輔許國乃曰：「小臣尚以冊立期請，吾輩一言可乎？」倉卒具疏，首列時行以上，時行聞之，駭且懼也。別具揭進云：「臣病在告，同官疏列臣名，臣不知也。故事，閣臣密揭俱留中，而是揭與諸疏同發，中外譁傳。于是禮科給事羅大紘遂直糾時行迎合固寵，而武英殿中書黃正賓繼之上，怒削大紘籍。廷杖正賓，獨輔臣王家屏又奏乞明春建儲，以塞道路揣摩之口。銷幃牆牽制之私，亦不報。次年春，禮科給事李獻可疏請皇長子出閣豫教，亦削籍。王家屏具揭申救，封還御批。上益大怒。于是科臣鍾羽正、舒宏緒等、臺臣錢一本、鄒德泳等，及部臣董嗣成等，交章論救，皆削籍降調。有差科員張養浩疏最後上，加杖一百。王家屏乃三疏乞歸，許之。吏部主事顧憲成、章嘉禎等疏言：「家屏忠愛獨至，不宜廢置。請乞召還，以光輔弼。」不報。然上意惡多言，怒甚。幸未卽有處分，而憲成已名震一時矣。既而禮部尚書李長春亦疏請冊儲，凡十有四上，不一報。長春因不自安，請罷去。是時中宮王皇后賢而多病，羣疑上意將以愛易長，欲借立嫡不立長之議，以箝衆口。或中宮病不可知，鄭貴妃卽可爲后，故濡遲以俟之。外廷章奏或有訶得此情，寓言微諷者，益觸疑忌。故聖意持之愈堅。至二十年壬辰冬，王錫爵還朝。次年癸巳正月，忽傳有中官賈御劄至，開錫爵獨袖歸私邸，隨具一密疏奏曰：「前者冊典垂行，輒爲外

廷激聒所阻。皇上親發大信。定于今年舉行。自是羣賢寂然。蓋知成命在上。有所恃以無虞也。倘命令過期。廷臣又必曰。昔以激聒而改選。今則何名而復緩。伏乞降勅允行。使盛美一歸于獨斷。而天功無與于人謀。上報曰。朕雖有今春冊立之旨。昨讀皇明祖訓。立嫡不立庶。今皇后年尙少。倘其有出。是二儲也。可先將三皇子並封王。俟數年後。皇后無出。乃行冊立可也。錫爵因復奏曰。昔漢明帝取宮人賈氏子。命馬皇后養之。唐元宗取楊良媛子。命王皇后養之。宋眞宗劉皇后取李宸妃之子爲子。與其曠日持久。待將來未定之天。孰若酌古準今。成目下兩全之美。臣謹遵諭。並擬傳帖二道。以憑採擇云云。其一倣明德皇后抱妃子爲子故事。使元子拜中宮爲母。其二則三王並封也。時閣中張位、趙志皋皆不與謀。禮垣都張貞觀叩錫爵邸得之。次日並封之旨竟下。時工部郎岳元聲走告科臣史孟麟及張貞觀曰。是舉如之何。貞觀曰。此錫爵密進計也。元聲又詣禮部郎陳泰來。遇科臣許弘綱。祠郎于孔兼。皆擬合疏。弘綱屬元聲發之。元聲曰。我方論錫爵。若言似有成心。于事無濟。其以元聲爲後勁可也。弘綱意不協。元聲遂歸草疏。與禮部郎顧允成、張納陛連名同上。允成卽憲成弟也。于是顧憲成有專疏暢言之曰。伏見皇上思祖訓立嫡之條。欲將三皇子並封。以待將來有嫡立嫡。無嫡立長。于此知皇上有惕然不敢自尊者。而必上合聖祖之心爲安也。又見皇上諭輔臣言朕爲天下主。無端受誣。于此知皇上有歉然若失者。而必下合天下人之心爲安也。惟是待之一言。皇上據以爲得。正天下人共據以爲失。此吉凶之原。安危之機。不可不辨之早而慎防也。夫太子爲天下本。立本所以不忘天下也。豫定所以固本也。是故有嫡立嫡。無嫡立長。

是也。待嫡非也。就現在論嫡之有無是也。待將來論嫡之有無非也。夫待之爲言也。濡遲而不決。懸設而難期。撓不刊之典。潰不易之防。墮不渝之信。叢不解之惑。開不救之釁。貽不測之憂。甚不可也。皇上之聖祖訓。惓惓矣。顧所載立嫡待嫡二條。意各有主。而于建儲事。判然不類。皇上第以己意援而附之。爲道訓訓乎。背祖訓乎。其不可一也。我朝建儲家法。東宮不待嫡。元子不並封。廷臣言之甚詳。皇上以其不合已。槩置弗省。其不可二也。主天下爲天子。天子之元子稱太子。太子之元子稱太孫。天子繫乎天也。君臣一體也。太子繫乎父也。太孫繫乎祖也。父子祖孫一體也。主鬯承祧。于是乎在。不可得而爵也。今欲並封三王。元子之封。何所繫乎。無所繫則難乎其爲名。有所繫則難乎其爲實。其不可三也。皇上亦曰。權宜云爾。夫權者。不得已而設也。元子升儲。諸子分藩。于理爲順。于情爲安。于分爲稱。于訓爲經。有何顧慮。有何牽制。有何不得已而然乎。耦尊均大。遍所由也。豈細故哉。而姑任之。其不可四也。皇上以聖祖爲法。聖子神孫以皇上爲法。皇上旣不難胤其所無。後世詎難襲其所有。自是而往。幸有嫡可也。不然。是無東宮也。毋乃悞萬世之大計乎。又幸而如皇上之英明可也。不然。是凡皇子皆東宮也。毋乃釀萬世之大患乎。其不可五也。皇后與皇上共承宗祧。期于宗祧得人而已。宗祧得人而皇后之職盡矣。豈必有嫡而後爲快。皇上以父道臨天下者也。皇后以母道臨天下者也。一體也。皇上之元子。卽皇后之元子。雖恭妃不得而私之。皇上之諸子。卽皇后之諸子。雖貴妃不得而私之。統于尊也。今庶民之家。妾有子。亦謂妻爲嫡母。豈必自己出而子之。如輔臣錫爵所請。必一拜后而稱子哉。皇上何不斷以大義而爲是區區者乎。其不

可六也。況始者旨下少待二三年。俄改于二十年。俄又改二十一年。然猶以歲月爲期也。今日待嫡。則并歲月未可期矣。德魯布而忽更。聖意遷而彌緩。非因豫潰。非因衆激。何以謝天下。其不可七也。夫人主必以天下爲心。自並封之命下。一日之間。叩關而上封事者。不可勝數。至于里巷小民。亦悵然若失。愕然若驚。聚族而議也。是孰使之然哉。此可見人心之公也。而皇上猶責錫爵以擠當。當錫爵趨召而來。正宜爲皇上定此大計。若排羣議而順上旨。豈曰擠當。惟須積誠矢忠。納皇上于無過之地。乃真擠當耳。不然。皇上尙不能如天下人心何。而況錫爵哉。其不可八也。皇上神明天縱。信非溺寵狎昵者比。而不諒者。見影疑形。聞響疑聲。皇上方以爲無端受誣。天下且以爲無端反汗。在臣等不能爲皇上解。恐皇上亦不能爲臣等解。皇上盛德大業。比隆三五。而乃來此意外之紛紛。不亦惜乎。其不可九也。此皆待之一言爲之也。伏願皇上反觀長慮。以成憲爲必不可違。以輿情爲必不可拂。以初命爲必不可爽。以新諭爲必不可行。元子早正儲位。諸子併錫王封。父父子子。君君臣臣。兄弟兄弟。宗廟之福。社稷之慶。萬世無疆之休。胥萃于此矣。此疏既上。又有書貽閣中曰。昨請教冊立事。實百其難。明旨一頒。何以轉移人情。洵何以鎮定上欲不愆于明旨。下欲不駭于人情。故曰難也。究竟請期一著。尙自可圖。然非閣下莫能任。自萬歷十四年以來。詔旨屢變。期約再三。然期未至而請之。皇上得執援激以爲辭。期既至而請之。皇上復何辭以謝天下。此遷延之故。可得而窮者也。今者又以待嫡爲辭。從今以往。復何所據以請乎。此假借之法。不可得而窮者也。閣下試端意而思之。建儲盛典也。九廟式臨。兩宮欣願。百官萬姓之所瞻企。而其言及者輒避。

罪。若有大不滿其意者。何也。斯亦可推矣。三王並封。耦尊齊大。意可觀矣。閣下不一上念之耶。秦皇漢武。詎非蓋世之雄。一念稍偏。遂墮婦人女子之手。雖二君執意及此乎。有嫡立嫡。無嫡立長。二語炳于日星。誰能奸諸長幼有序之說。明旨不啻再見。何至今日更益立嫡之條。重以祖訓。憑以中宮。彌縫轉易。挽回轉難。年復一年。將何底止。竊以爲宜聽九卿科道。仍遵屢旨。合詞請行。而閣下從中調劑。懇決定期。卽甚遲不得越一年。庶幾聖心確有所主。不開窺伺之端。人心專有所向。不萌二三之釁。議論雖囂而自靜。國本幾搖而獲安。此真閣下事矣。一請不得。當至再至三。至于十百。乃至千去就。至于死生。可也。若皇上懸不必然之說。以蓋立長之成命。閣下又操不必然之見。以達立嫡之託辭。交相爲負。非所望于今日君臣也。時國博薛敷教亦有書上太倉相曰。中宮有出而始重。則仁聖之心不安。後宮有出而終輕。則慈聖之體亦屈。尤扼要動心之論也。岳元聲。顧允成。公疏中語。亦云皇上正位青宮之日。仁聖猶年少。莊皇帝不設爲未然事。以誤大典。刑科王如堅。光祿丞朱維京疏。略云。皇上念及中宮良厚。顧中宮春秋方盛。前星一耀。則所冊元子。自當避位。何嫌何疑。今以將來未然之事。格見在已成之命。恐中宮聞之。亦不安于心也。上乃以手割咨錫爵。錫爵依違未決。又有光祿少卿徐傑。署丞王學曾疏。繼入。上怒甚。兩光祿並爲民。而如堅維京。謫戍矣。于是六科李汝華。張貞觀。許弘綱。史孟麟等。同見錫爵于朝房。錫爵問曰。並封事都院多以爲是。諸公又何言。孟麟曰。祖宗二百年來。東宮不待嫡。元子不封王。今日翬舉。殊駭人耳。錫爵曰。東宮不待嫡。吾亦知之。但皇上必欲如此。元子不封王。穆廟之封裕王。何也。錫爵引此。益自彰其乖謬。世

廟因始立太子天亡。再立第二子爲太子。而穆廟乃第三子。故同日封王。豈亦元子哉。于是孟麟對曰。穆廟之封裕王。非元子也。封王又非徽號之比。今日所封之王。卽他日所之之國。普天之下。莫非元子之國。將以何國封元子乎。錫爵久之曰。當如祖宗舊名。孟麟曰。更有大可慮者。元子冠婚在邇。封王則當出居于王府。冠婚皆以王禮行矣。元子在外。諸幼子在宮中。老先生擔當得否。錫爵乃語塞而罷。又一日。孟麟又偕顧憲成。于孔兼。張輔之。以同鄉誼。見錫爵。錫爵顧孔兼曰。封王儀注已進乎。孔兼曰。未敢進。孟麟曰。國家但有立太子儀注。及封王儀注。今以太子封王。于郎中何敢進儀注。錫爵曰。昨皇上處科臣如堅等四人太重。吾已具揭救矣。孟麟曰。朝廷養士。正爲今日。凡杖戍降謫。自建言者分內事。老先生只要把事體端正。諸臣得罪。甘心也。是時文武臣工。皆各有疏爭。且議更番伏闕。至安福令夏九鼎。亦有疏奏。而朝臣之獨緘口者。祭酒曾朝節也。錫爵旣奏。精覓釋言者。得旨如堅。維京。免戍。僅爲民。而岳元聲。顧允成。張納陞等合疏下。亦奪俸而已。于是元聲。允成。納陞。又偕于孔兼。陳泰來。鍾化民。曾鳳儀。李啓美。項德禎等。而詰錫爵于朝房。錫爵對之色甚厲。元聲抗言曰。閣下奈何誤引親王入繼之文。爲儲君待嫡之例。鳳儀語稍遜。欲從旁解之。元聲厲聲呵曰。曾員外不知祖訓。錫爵容始霽。衆欲出。元聲曰。大事未定。奈何出。錫爵曰。然則如何。元聲曰。當以廷臣相迫。告諸皇上。錫爵曰。書諸公之名以進何如。元聲曰。請卽以元聲爲首。杖戍惟命。錫爵唯唯。于是庶吉士李騰芳上書于錫爵曰。聖明在上。議者俱爲杞憂。以公苦心。疑爲集菴。此皆妄也。但聞古賢豪權謀之事。必度其身能作之。身能收之。則不妨晦其迹于一時。而究竟能皎然。

于天下。公今欲暫承上意，巧借王封，轉作冊立。然以公之明，試度事機，急則旦夕，緩則一二年，竟公在朝之日，可必遂公之志否？恐王封既定，大典愈遲。他日繼公之後者，精誠智力，稍不如公，或至壞公事。隱公功而罪公爲尸謀，公何辭以解此不獨宗社之憂，亦公子孫之禍也。錫爵乃懷然曰：諸公冒我，我無以自明。如子言，我受教。但我每揭皆手書，祕迹甚明也。芳曰：揭帖手書，人何由知？異日能使天子出公手書，傳示天下乎？錫爵默然良久，復曰：古人如留侯、鄴侯，皆以權勝。騰芳曰：鄴侯不欲以建寧爲元帥，而咏黃臺瓜詩以衛廣平，此經也，非權也。但與肅宗私議家事，恐上皇不安，而遲廣平爲太子，別是一則。然建寧之死，胎此矣。若子房以強諫爲無益，而招致四皓，有似行權，然未嘗請太子與趙王並封，且行權必大智人，委曲宛轉，或立語旋移，或默然鎮定。若需之數年，更以他手，雖聖人不能保矣。語次，錫爵爲之泣下。翼日上疏自劾三誤，又奏請冊立。上乃命三皇子俱停封。錫爵又奏曰：皇上旋止並封之舉，再訂二三年冊立之期，真古聖王從善轉圜之盛德。願臣私憂過計，去年之命，既改于今年，則烏知今年之命，不改于他日？夫人情惟無疑則已，疑心一生，則將猜及宮禁之隱情，慮及萬世之流禍矣。又曰：皇長子年近加冠，未就外傳，此從古所未聞。皇上縱欲少緩冊立之期，豈可不先行豫教之禮云云。上猶未許。尋降陳泰來于孔兼，願允成。及薛敷教等于外，削禮科張貞觀籍爲民。又一日，上御煖閣，召見輔臣王錫爵。錫爵叩頭力請建儲。上允明年出閣講學。尋又傳諭皇長子皇三子年齡差等，宜一併行出閣禮。錫爵復奏：皇上有子而均愛之，均教之，固慈父一體之念。然自外廷觀之，皇長子明年十三歲，皇三子明年九歲，大抵童年十歲

而入學。以皇長子之太遲。形皇三子之太早。先後緩急之間。一不慎而聖心又晦矣。是冬十二月。錫爵奏請皇長子先行冠禮。上報云。東宮與王袞冕皮弁二服。冠則皆同。其服則異。今冠禮將何從。宜暫用常服出講。至次年二十二年甲午二月。皇長子出閣講讀。禮部侍郎馮琦進儀注。上以未冊立。免侍衛儀仗。故事。每逢講期。閣臣一人入直看講。講案前有銅雙鶴。諸臣叩頭畢。從銅鶴下轉東西面立。時閣臣誤出銅鶴上。皇長子囑內侍曰。移銅鶴近前些。雖不明言。意有囑寓。左右皆嘆服。一日。講巧言亂德章。解曰。以是爲非。以非爲是。講官旣敷衍畢。因問曰。何以謂之亂德。皇長子朗然答曰。顛倒是非。卽化詞臣之句而藥括之。尤爲明切。講官焦竑請問。惟皇上帝降衷于下民。若有恆性。大義云何。答曰。只天命之謂性是已。又講官董其昌請問。擇可勞而勞之何意。答曰。所謂不輕用民力也。諸臣皆嘆服。又後一年。出閣講日。值天嚴寒。皇長子嚙甚。講官郭正域大聲言。天寒如此。殿下宜珍重。因呼役取火禦寒。時中官圍爐密室。開正域言出之。上聞而不罪也。二十八年春。禮部尙書余繼登奏請皇長子先冊立。而後冠禮。可致祝。婚禮可致醮。閣臣沈一貫。南禮部侍郎葉向高等。亦乞行皇長子三大禮。俱不報。是年三月。移皇長子居慈慶宮。因諭內閣冊立有期。羣臣不得瀆擾。秋七月。又降諭。皇長子清弱。大禮稍俟之。百官毋沾名煩聒。十一月。戚臣鄭國泰疏請皇長子先冠婚。後冊立。科臣王士昌糾之。署禮部朱國祚論國泰顛倒言說。有背明旨。恐釀禍非小。俱不報。二十九年八月。閣臣沈一貫疏奏云。詩旣醉之篇。臣祝其君曰。君子萬年。介爾景福。又繼曰。君子萬年。永錫祚胤。則願其子孫之多。又曰。釐爾女士。從以孫子。則願酬淑配而生賢子孫也。斯

千之篇曰。築室百堵。西南其戶。爰居爰處。爰笑爰語。美新宮也。繼卽曰。吉夢維何。維熊維羆。男子之祥。言吉祥善事。當生聖子神孫。慶衍無疆也。今兩宮落成。萬壽稱觴。在廷同祝。而啓天發祥。實自聖心始。皇上大婚及時。故早得聖子。今皇長子大禮。宜備其儀。推念至情。不如早諧伉儷之爲適。皇上孝奉聖母。朝夕起居。不如早遂含飴弄曾孫之爲樂。乞今年先行皇長子大禮。明春後遞舉諸皇子禮。子復生子。孫復生孫。坐見本支之盛。享令名集完福矣。上覽之心動。諭俟卽日行之。冬十月。上猶以典禮未備。更欲改期。一貫封還諭旨。又力陳其不可。幸顯皇后在中宮。篤愛皇長子。一夕。上中寒病甚。誤傳有非常之耗。貴妃弟都督鄭國泰。遣蒼頭監奴入宮門偵伺。尾相接于道。其賓客皆爲僮奴粧。夜裂硃光綾方三尺許者。以萬計。皆用都督私記鈐之。而裹一寡蹄其中。人置懷袖間。各以爲驗。意萌叵測。不知云何。旣漏下三鼓。上忽汗病良已。見貴妃不侍疾。獨皇后在側。流涕被面。上大感悟。待后有加禮。皇長子以是益安。又一日。上于宮中召皇長子及諸皇子入侍宴。宴間。娓娓作家人款語。忽憶曩時。曾以外國所進玉卮。賜皇長子。仍以幼故。轉授貴妃爲襲藏之。願謂內侍。從貴妃所取向者。所賜玉卮來。貴妃以久遂忘之。不知所在。內侍具以復命。上疑貴妃有意毀之。大爲不悅。罷宴。夜半傳旨。閣中令禮臣具冊立儀。以聞。時廷臣爭建儲事。垂二十年。度不能得上意。旣久而姑置之。一旦事起倉猝。禮臣馮琦受命入部。立召諸曹郎條議。皆昧昧不知所對。又不及詳考故牒。乃撮舉其凡口授吏役傳寫之。厥明。儀成奏上。冊寶尙未及鑄。上特命輔臣于尊上皇太后徽號之日。從御前補賜。遂擇吉是月十五日。冊立皇太子。暨封福。瑞。惠。桂。四王。詔告天下。二

十八日壬辰。皇太子加冠。三十年春正月。增設東宮官屬。二月丙子。冊皇太子妃郭氏。○三十九年秋九月。皇太子母恭妃王氏薨。雖生皇太子。失寵。目眚。久不侍上。比病革。始報太子知之。亟至省候。宮門尚閉。挾鎗而入。妃手循太子衣泣曰。兒長大如此。我死何憾。太子號慟。左右皆泣。莫能仰視。須臾薨。越三日。始傳宣于外。閣中具疏慰安。得旨。朕以誕育皇太子。命居一宮自適。前月聞偶疾。卽著皇太子問安數次。不意昨已逝。朕深悼惜。該部具儀擇葬以聞。至十一月。得旨。一切喪儀從厚。舊用三萬。今加十六萬。隱然皇太后儀節矣。祠郎鮑應鰲一力擔任。而葉向高實主持焉。上心然之。卽貴妃不敢沮也。迄發引日。皇太子送至厚載門而返。自此深德向高。言輒淚下。當報此大恩人。左右皆聞之。

論曰。自國本始爭。申王憑高召侮。而朝端之門戶始分。然則門戶之厲階。實申王爲梗也。二相執政日久。恐失主眷。惟以委蛇容悅爲工。而不知輔弼之要。全在格心。若意存固寵。則不能格心矣。況國本大事。關係匪細。閣中密揭。同符先後。方策具有成訓。宰執漫無稽攷。其爲尸位曠職。似太倉之叢詬。較浮于吳門也。迄後罪言將順。密移帝心。願反成于四明之手。四明在閣。衣鉢相承。而時會事機所值。有幸不幸焉。申王不特有愧諸賢。抑并媿四明也。逮國本既定。而宮府之鷹犬。實繁有徒。妖由人興。戎伏于莽。摘瓜未遂。而禍發于挺擊之奇兒。神器難窺。而蠱成于女謁之鳩毒。國脈之斬也。光廟一身。先見端矣。豈不痛哉。

一妖書之異

存是錄

萬歷三十一年癸卯十一月有妖書布行都下名曰續憂危竝議一夜間自宮門迄于衢巷皆遍凡三百餘言厥明舉朝相詫爲之失色其言曰或有問于鄭福成曰今天下太平國本已固無復可憂矣而先生常有不豫色然何也鄭福成曰是何言哉今之事勢正所謂厝火積薪之下也或曰甚矣哉先生之言也得毋謂儲位未安乎曰然夫東宮有東宮之官一官未備何以稱乎皇上迫于沈相公之請不得已立之而從官不備正所以寓他日改易之意也曰改立其誰當之曰福王矣大率母愛者子抱以鄭貴妃之尊寵回天轉日何難哉曰何以知之曰以用朱相公知之夫在朝在野固不乏人而必相朱者朱名賡賡者更也所以寓他日更易之意也曰是固然矣朱公一人安能盡得衆心而必無變亂乎曰陋哉子之言矣夫蟻附羶蠅逐臭今之仕宦者皆是也豈有相公倡之而衆不附者乎且均是子也長可立次未必不可立侯之門仁義存誰肯舍富貴而趁死亡哉或曰衆附姓名可得數否曰余數之熟矣文臣則有王世揚孫瑋李汶張養志武臣則有王之禎陳汝忠王名世王承恩鄭國泰而又有鄭貴妃主之于內此之謂十亂論語云有婦人焉九人而已又正合文王舍伯邑考而立武王之義也曰何以知此數人之所爲乎曰數人皆人傑也無不望分茅胙土豈止富貴終其身而已乎故有王世揚陳汝忠則甲兵爪牙取諸京營而自足矣有李汶則三邊險要有人控制矣有孫瑋在保定則扼天下之咽喉而四方勤王兵無由入矣有王之禎在宿衛則禁城有人誰能斬關而入乎曰是則然矣若張養志王承恩王名世者何所用之曰養志山陰私人也二王山陰鄉人也私與同鄉無不願借相公之餘光者況有以招徠之乎曰然則事可

濟乎。曰：必濟。庸夫倡議，人多景從，而此數公皆人傑也。況有貴妃及大璫陳矩，朝夕在帝左右，互爲謀主，同舉大事，何謂無成？或曰：蛟門公獨無言乎？曰：蛟門爲入陰賊，嘗用人而不用于人，故福則自承之，禍則思規避而不染矣。何以見其然也？錦衣西司房類奏有名，自祖宗朝無有不陞者，今皇親王道化，本內有名而竟不陞，豈其才力出衆備下哉？此蛟門欲右鄭而左王，密令親家史起欽，抑其功而不錄，亦王之禍所嚆授也。曰：然則子將何法以處此？曰：天之所興不可廢也，天之所廢不可興也。余止聽天耳，安能反天哉？或人唯唯而退。後署吏科都給事中項應祥撰掌河南道事，四川道監察御史喬應甲書于時，閣臣朱賡亦從私宅門首得其一冊以聞，請緝造書主名，且乞歸待罪，上不允。震怒，立命廠衛嚴行搜捕，因責項應祥。喬應甲各回奏，先是十八年庚寅，有山西按察使呂坤著有閨範圖誌一書，戚臣鄭國泰進達御覽，上以賜鄭貴妃。貴妃仍授國泰重刻之，增列后妃首漢明德皇后，終鄭貴妃。吏科給事中戴士衡有疏直參呂坤逢迎掖庭，有包藏禍心語，侵及貴妃，又全椒知縣樊玉衡亦上疏冒冊立事，及鄭貴妃不智等語。貴妃聞之，泣訴于上，又會有援引歷代嫡庶廢立之事，著成一書，名憂危竝議者，中刺張養蒙、魏允貞、劉道亨、程紹白所知。呂坤、鄭承恩等戚黨疑出士衡手，閣臣張位教之。鄭承恩遂上疏辨論，并奏戴士衡假造僞書，中傷善類，目爲二衡，以激聖怒。于是士衡與玉衡俱削籍謫戍，御史趙之翰亦有疏指此書爲士衡僞造。主于張位而預謀者劉楚先、徐作、劉應秋、楊廷蘭、萬建崑也。中旨罷劉楚先、徐作而降謫應秋等。有差。張位先以密薦楊鎬，東征失利罷去，命值赦不宥。至是妖書續出，遙相相應，或以爲似出清流所作。

將以傾沈一貫者。又或曰：此奸人所爲，欲以陷郭正域。時正域有清流領袖之目，見忌于一貫，而一貫方以楚宗事恨正域，囚正域又沈鯉門生也。鯉素踣踣負時望，每語人曰：「此事何必張皇也。」一貫聞之，大不懌。時正域已放歸，待凍潞河之楊村，師弟間問猶不絕。一貫益側目，陰使給事錢夢臯、御史康丕揚出疏直斥正域，并及鯉。適漢中府同知胡化出首撰妖書，人爲渠縣訓導阮明卿，而明卿乃夢臯姻也。初，吳江縣醫人沈令譽多貴游，丕揚巡城跡捕之，搜得楚王揭華越副封及刑部主事于玉立所致吏部郎王士駟書，以玉立起官。正域與士駟左右之，故丕揚約夢臯同時發難。首攻正域，疏稱：「沈令譽、郭氏之食客，胡化、同鄉之密友，當亟訊奸黨治罪。」次輔沈鯉，屢爲奸人緩頰，舉朝曰：「大變彼獨曰小事。」舉朝曰：「當捕彼。」獨曰：「可容其所。」上揭有震動人心、虧損聖德等語，回互隱伏，意欲何爲？疏入，中外大駭。巡捕都督陳汝忠、緝得正域舍人毛尙文、江夏布衣王忠等，又發卒圍正域舟，捕其僕隸乳媼共十三人，丕揚又誣及高僧達觀，并捕琴士鍾澄、百戶劉相等。同沈令譽送詔獄，拷訊無所得。錦衣王之禎又首同官都督周嘉慶、下東廠會鞠，閹門慘掠，嘉慶亦不承。冢卿李戴、嘉慶婦翁也，見拷掠不忍視，起入中堂，上聞而惡之，罷戴歸。時刑曹主斯獄者爲開封人王述古，一貫授意司寇蕭大亨，屬述古撈治胡化，令化供妖書出。正域及鯉手述古正色曰：「若是則分宜、江陵再見今日矣。」大亨曰：「此公論也。」述古曰：「誰爲公論？」大亨曰：「公論在臺省。」述古曰：「天下有公論，未必在臺省。臺省有公論，未必只一二人。」某公某公，俟會鞠自見。及再鞠胡化，述古遂立疏送大理，舉朝大譁。嗤司寇爲司官所持，司寇亦大譁，謂司屬敗乃公事。又刼之入正域名，必不可。」

之重罪胡化，必不可。刼之禍且不測。述古怡然安之，卒不易原疏一字。會皇太子遣閹人諭閣中曰：先生們容我乞全郭侍郎，然錦衣官嚴緝邏校者，尙環逼沈鯉邸第，迫脅不堪。蓋因一貫私人獻媚，爲翦除異己，借端起大獄，挑激聖怒，爲一網計。適胡化爲江夏人，與正域同鄉，因與阮明卿有夙憾，諸奸謂是郭正域所使，自造妖書，誣明卿以脫己也。時憲臣溫純上書訟言之，唐文獻、陶望齡等先後詣一貫爲解，司禮監陳矩、秉正不阿，力持之，而鯉始得安。卽疏請引咎乞歸，未許。旣而項應祥、喬應甲回奏，謗書無自名理，亦竟置不復問。一日，上特召皇太子慰安之，且大聲面諭曰：汝莫恐，不干汝事。汝但讀書寫字，我的慈愛汝知之。汝的孝友，我亦知之。此事乃逆惡捏造奸謀，離間我父子兄弟，要動搖天下也。因出御筆手書訓誠一冊賜之曰：汝將去細看誦，則知我之心矣。皇太子泣下，上亦泣。隨命內侍以慰安太子語傳諭閣中知道。最後緝獲得嫩生光、錦衣番役于生光寓中，搜出羅紋箋一幅，寫十大說，又獲得刻字匠徐承惠爲證。于是掌衛事左都督王之禎題，獲得男子二名，嫩生光、嫩其篤，婦人二名，趙氏、陳氏。生光供稱原係順天府學生員，先年專以刊刻打詐爲事。于二十八年，被生員田大有等具告提學御史斥革，發遣大同營差，不合潛逃回京，受盡百般苦楚，皆由皇親鄭家毒害，無計可以報冤。只有國本二字，事關大逆，故刻妖詩，再刻岸游稿，猶以爲動不得他，續造國本攸關一書，密僱徐承惠刊刻，令伊子嫩其篤、黑夜擲鄭皇親家及閣部諸大臣門首，流傳下去。皇親鄭家定有不測之禍，可報今日大冤也。又提到刻字匠徐承惠招稱二十八年十月內，刻過妖書小木板一塊，又三十一年六月內，惠與生光刻過岸游稿十二張。本年十